

# Archeoastronomie in Friûl

Nando Patat \*

**C**hel de antichitât al è un striament sutîl, che al è un grum dificil di slontanâ, soreduet se nus fevele de nestre stesse storie, des nestris lidrîs plui profundis. E tancj a son i segns des culturis plui antighis che a son ancjemò vîfs ore presint. Fra chescj, e che a son comuns a dutis lis popolazions de Tiere, a son chei leâts ai fenomens celescj e al lôr lent ma regolâr ripetisi intal temp. La osservazion dal cîl e devi sei scomençade dut une cul svilup des primis civiltâts e e je-re di sigûr presint inte ete preistoriche. I ritmis des stagjons leâts al cicli regolâr dal soreli, il movisi complès ma ripetitif de lune, il cori ator dai planets plui vicins e la precession lentonone dal as de Tiere a son stâts seguîts, studiâts e capîts cuntune perseverance che nus lasse cence peraulis. Daspò dai prins studis fats ae fin dal Votcent dal astronom inglês Norman Lockyer, il stes che al à metût in pîts il tant nomenât gjornâl *Nature*, il grum des cognossincis sui fenomens celescj che l'om al veve inte plui lontane antichitât al è lât cressint e, massime da-spò dai agns Setante, al è vignût fûr un numar simpri plui grant di studis in chest cjamp.

La pocje convinzion che sul imprim la archeologie academiche e veve mostrade

tai confronts de archeoastronomie e je la-de sfantantsi, par lassâ il puest a un numar simpri plui grant di ricercjis e di ri-sultâts. A son vignûts cussì ae lûs fats sorprendents, che a van de orientazion des sepulturis preistorichis a chêz dai sîts megalitics, des piramidis de meso-Americe ai Mohai de Isule di Pasche, dome par ricuardâ i cás plui nomenâts.


Insiemit ai studis fats sui sîts plui congnossûts, come l'altiplan di Gizeh in Egjit o Stonehenge in Gran Bretagne, a son stadis fatis ricercjis in sîts cussì dits minôrs, ma dal pâr plens di testemo-neancis di un ciert rilêf.


In Italie cheste dissipline no si è slar-gjade plui di tant, massime fûr dal trop dai specialiscj. Fale cualchi lavôr di di-vulgazion puartât indenant di astronoms come Giuliano Romano, Vittorio Castel-lani, Adriano Gaspani e Giulio Magli, si è fat vonde pôc, ancie se al va dite che no mancjin iniziativis amatoriâls di dut ri-spiet. Par ce che al rivuarde il nestri Friûl, nol è di smaraveâsi se al è stât fat ancjemò mancul.

Fale i studis puartâts indenant di Ro-mano e dai siei colaboradôrs su cualchi cjastelîr de planure furlane, a mancjin dal dut studis sistematics, ancie se in region


---

\* Organizazion Europeane pe Ricerche Astronomiche tal Emisferi Austrâl - ESO Garching b. Miin-chén, Gjermanie





*I mohai de Isule di Pasche, Chile (fotografie dal autôr)*




a son sîts che a somein prometi robis interessantis. Il Friûl, tiere di passaç e pont di incuintri fra lis civiltâts latine, slave e gjermaniche, al podarès di fat platâ sorpresis interessantis in chest cjamp.



Un pôc cun chê di jemplâ cualchidune des busis che ancjemò o vin a rivuارت de nestre storie pui antighe, ma ancje par conciliâ i miei interès scientificks cu la passion pe storie de mê tiere, za fa agns o ai scomençât a dedicâmi a cheste marraveose dissiplinе, che de astronomie di posizion e sconfine te archeologjie e te antropologjie.

Il gno lavôr nol podeve che tacâ cu la antighissime glesie di San Martin di Dartigne, che al è il gno païs. Par dî la veretât, cheste decision no le ai cjapade dome par une cuistion di afiet, ma ancje par vie che chest sít al à vude une cierte impuantance za inte ete protosto-


riche. Chenti, i Romans a vevin fate sù scusat dal sigûr une des lôr tors di vuardie, par tignî a ments une croserie di stradis un grum impuantantis juste li dongje. E ancje i Langobarts, stant a ce che nus à lassât scrit Pauli di Warnerfrit, clamât ancje Diacun, a Dartigne a vevin fate sù une des lôr struturis di difese par fâi cuintrî ae calade dai Avârs. Ancje te Ete di Mieç, su la culine al je-re un cjastiel ce tant impuantant, che al è stât sdrumât par vie des vueris cu la vicine Glemone.

Tant che la presince romane e langobarde a son testemoneadis di diviers reperts archeologjics, pôc o nuie si sa di ce che al sucedeve in cheste part dal Friûl in temps plui antîcs. Jacum Baldissera, intal so libri stampât tal 1901, al fevele di manufats cjafâts su la culine, che purtrop a son lâts pierdûts. Chescj reperts a testemonein la freqüen-





*Il cjastelîr di Gjalarian (UD) viodût dal satelit*




tazion dal sît in epoche preromane, fat dal rest no dal dut sorprendent. A chest proposit, mi plâs culì ripuartâ un fat interessant, che mi à pandût pôc temp fa la archeolighe Susi Corazza dal Laboratori di Protostorie de Universitât di Udin. Intune colezion di proprietât de Universitât di Padue, si à ciatât un pâr di gançs di cinturie sanitics, de prime metât dal cuart secul denant di Crist. Ce che a fasessin chescj ornamenti rituâi a Dartigne, cussi tant lontans dal lûc dulà che a àn di vêju produsûts, al reste un misteri.


La culine di Sant Martin e reste su la man çampe idrografiche dal Tiliment, protezude dal cori ator capriçôs dal sojet, vonde adalt rispiet ae planure aluvionâl di Osôf e duncje un grum adat a ospitâ un insediament uman, che si pues rivâ cun facilitât e che si pues difindi cun ancjetante facilitât. Sul finî de

ultime glaciazion, un dîs mil agns in daûr, la zone dentri dai anfiteatris morenics produsûts dai depuesits aluvionâi dal front glaciâl si è jemplade cu lis aghis di fusion, lassant un grant lâc, come che a dimostrin i studis dal gjeolic Federico Sgobino. A soreli jevât il lâc al tocjave lis primis rivis dal Faêt e dal Cuarnan e chei che vuê o viodin come i cuei di Osôf a jerin piçulis isulis.

Inte ete romane il lâc si jere bielzà suiât ma cuasit dal sigûr a restavin zonis malsanis di palût, che i inzegnîrs romans a lassarin in bande, fasint passâ la strade a jevât dal cuel di Sant Martin, e duncje lontan dal palût e des esondazions dal Tiliment.

Lant plui indaûr cul temp, o podìn imagjinâ che ancje l'om preistoric al sedi stât une vore atent a tignîsi lontan de planure e che il passaç a soreli jevât dal cuel al sedi stât doprât benzà ta lis epo-





chis plui antighis. In cheste ricostruzion, la culine e veve di presentâsi come un promontori sul lâc, tant che cierts studiôs a proponin la vôs slave *rt* (ven a stâi promontori, apont) come origjine dal toponim Artigne. In chest stes contest, ancjetant valide e semee ancje la divignince dal tiermin latin *arctus* (ven a stâi *strent*), che al sarès leât al passaç avonde stret fra la culine e lis primis rivis de mont Faêt. In ogni câs, i studiôs a son convints che il sít di Dartigne al sedi stât frequentât benzà te antichitât e che, in particolâr, su la culine di San Martin al fos un cjestelîr di alture, de sorte di chel dal Cumeli. Chestis struturis di difese, metudis in pueste vonde adalt e che si viodevin une cun chê altre, a vevin di rappresentâ un eficient sisteme abitatîf e difensif tal Friûl culinâr.

Fats chescj resonaments, al jere vonde clâr che il cuel di Dartigne al jere un dai miôr sítis dulà començâ cheste sorte di ricerche, dal dut gnove in cheste bande de nestre regjon. In efiets, dongje dai fats che o ai benzà discutûts, al va dite che insom de culine e je une glesie antigone, intitulade a sant Martin, che Giancarlo Menis al definìs venerande intune sô publicazion, fate cuant che a son stâts metûts a puest i afrescs dal Cinccent di Zuan Pauli Thanner. L'opinion che plui o mancul ducj i studiôs a àn e je che la costruzion che o viodin in dì di vuê, sorevivude a taramots e vueiris, e sedi vignude sù suntun nucli dai seui VII-IX a.D.

Come tancj altris edificis antîcs, la glesie e je orientade cul absit a soreli je-vât, mentri che la jentrade e je zirade viers soreli a mont. Fevelant di chest aspiet, al è impuantant rindisi cont che cheste orientazion e jere presinte intes costruzions sacris ben prin che al rivâs il

Cristianism, e che il stes concei di Nîce (325 a.D.) al à stabilide la sô applicazion pe costruzion di dutis lis glesiis cristianis, lant daûr di chê linie di inculturazion de fede che e incoragjave la trasformazion e la inglobazion tes pratichis de gnove religjon di fats e usancis benzà presintis tes culturis prechristianis.



Une vore dispès lis glesiis a vignivin fatis sù parsore dai rescj di edificis pagans, che a jerin orientâts in mût contrari. Dome viers il V secul a.D., une bole papâl e stabili che lis glesiis a vevin di sei ziradis, par fâi cuintri al comparî di cults solârs, come chel dal diu Mitre, presint ancje inte nestre Aquilee.

Di fat, lis glesiis antighis cul absit a soreli a mont a son rarîs e fra i esemplis plui cognossûts si puedin nomenâ la basiliche di san Pieri e chê di san Zuan in Lateran a Rome. Un esempi furlan al è chel dal domo di Tumieç.

Ma cualis jerino lis direzions plui impuantantis? Dal pont di viste astronomic a son cuatri moments di fonde che, je-sint leâts al moto aparint dal soreli, a segnin l'inizi des stagjons e, intes civiltâts agriculis, a marcjin events di grande impuantance come il semenâ e il cjapâ sù tai cjamps. Par clâr o stoï fevelant dai ecuinozis e dai solstizis. E culì o scugnìn jentrâ un tic di plui tal aspiet tecnic de question.

Par vie dal moviment di rivoluzion de Tiere ator dal soreli e de inclinazion dal as di rotazion de Tiere rispet al plan de sô orbite, vie pal an il soreli al fâs tal cîl un zîr aparint che lu puarte a tocjâ la massime altece sul orizont viers il 21 di Jugn (solstizi d'istât) e chê minime viers il 21 di Dicembar (solstizi d'unvier).

I rîts solstiziâi a son vecjons e a son difondûts ore presint. Inte Europe dal nord (ma za ancje in Baviere, par esempi), al



Posizion de Tiere ai solstizis (a drete e a çampe) e ai ecuinoziis (in alt e in bas)

solstizi estîf si impiin grancj fûcs, par celebrâ il trionf dal soreli. In Cjargne, vie pe gnot di san Zuan, si use fâ rodolâ *lis cidulis*, che a son des ruedis di len in flamus, che a podaressin sei une rappresentazion dal soreli che al va jù viers lis regjons dal scûr e dal frêt.


Il solstizi d'uvier al jere ancjemò plui impuantant. In etis dulà che no si saveve nuie de mecaniche celeste, che il soreli al tornâs indaûr, puartant di gnûf la lûs e il cjalt nol jere un fat sigûr e, par chel, un grum di culturis a celebravin rîts di propiziazion.


Cun di fat, il Nadâl cristian al à cjapât il puest dal *Sol Invictus Dies Natalis*, une fieste solstiziâl pagane, che in ete romane e colave ai 25 di Dicembar. Ancje i madins, e i *pignarûi* furlans a podaressin

sei di divignince prechristiane e a saressin leâts al solstizi d'uvier.

Plui o mancul a mieze strade fra i doi solstizis a son i ecuinozis, chel de vierte e chel de sierade. Massime il prin al segnave un moment ce tant impuantant, che al colave te zornade dulà che il dì al scomençave a jessi pui lunc de gnot, segnant duncje la vitorie dal lusôr sul scûr, dal cjalt sul frêt, de vite su la muart.

E cussì, par esempli, i cults ecuinoziâi a fasin nassi la *Pesah* dai Ebreus (il passaç) fintremai a risultâ, inte Pasche di Resurrezion, la celebrazion plui impuantante dal calendari liturgjic cristian. A rivuort di cheste cuistion, al va dite che tai prins secui dal Cristianism la Pasche e vignive celebrade ogni domenie e che dome da spò dal concei di Nicee si à stabilît di fis-






sâ la date de Pasche ae domenie che e ven do-  
po dal prin colm di lu-  
ne (dut câs chel *glesea-  
stic*) che al seguìs l'e-  
cuinozi de vierte.

Tignût in cont ce  
che al dure un mês lu-  
nár, la Pasche e pues  
colâ fin a plui o man-  
cul un mês dopo dal  
ecuinozi stes.

Te Ete di Mieç la  
fieste pe fondazion di  
une gnove glesie si le  
faseve dispès sul cricâ  
dal dì di Pasche e l'e-  
difici cultuâl al vigni-  
ve orientât vie pe dire-  
zion marcjade dal pont  
dulà che il soreli al vignive fûr dal ori-  
zont in chê zornade. Altris voltis l'ori-  
tazion sielzude e jere chê dal nassi dal so-  
reli al solstizi d'unvier, un grum dongje  
al dì di Nadâl, come in tal câs de cate-  
drâl di san Scjefin a Viene. Vonde difon-  
dude ancje la tradizion di meti lis glesiis  
in linie cu la direzion dal nassi dal sore-  
li inte dì che si celebre il sant titolâr.

In gjenerâl i alineaments ecuinoziâi  
precîs a son rârs e par solit a suggerissin  
une edificazion antighe, massime tai  
câs dulà che, par vie des monts li atôr,  
l'orizont naturâl nol sedi libar e la pos-  
zion dal soreli a moment dal so nassi in-  
te dì dai ecuinozis nol coli sul pont gar-  
denâl est.



E chest al è propit il câs de venerande  
plêf di san Martin a Dartigne. I rilêfs fats  
cul jutori des modernis tecnologjiis a àn  
mostrât che l'as dal absit, ven a stâi il  
nucli plui antic dal edifici, al à une de-  
viazion di dome 0.7 grâts rispett ae dire-  
zion est-oest gjeografiche. Intal cjamp  
de archeoastronomie, un erôr di cheste



*Efet de presince di monts su la jevade dal soreli*

fate al ven considerât vonde piçul. Ti-  
gnint in considerazion il fat che l'orizont  
naturâl (soredut chel di soreli jevât) al è  
disturbât des monts vicinis, al è vonde  
resonevul pensâ che chei che a faserin sù  
la glesiie (o ce che al jere prin de glesiie) a  
doprarin un metodo astronomic pluitost  
che semplicementri fat riferiment ae da-  
te dal ecuinozi dade dal calendari, come  
che si usave te Ete di Mieç. In sostance,  
al è pussibil fâ il supuest che l'edifici,  
che nus comparîs come che al veve di sei  
dopo che al è stât comedât daspò dal tre-  
ment taramot dal 1511, al sedi stât fat  
sù su lis fondis di une costruzion plui  
vecje, ben plui antighe dal templi langobart  
e leade a cualchi cult solâr. Dut câs,  
bisugne ancje tignî presint che la preci-  
sion di chest alineament e podarès sei  
ancje dal dut casuâl e che il supuest di  
une diffusion di tecnichis astronomichis  
in cheste zone e à di jessi verificade cun-  
tun studi sistematic suntun numar di  
sits une vore plui grant.

Propit par chest al è nassût il progetto A



Plante de glesie di Sant Martin. La gridele di riferiment e jè chê des coordenadis gjeografichis, orientadis al nord vér


soreli jevât, cu la idee di misurâ un numar plui grant pussibil di sîts antîcs in Friûl e in Cjargne, e di puartâ indenant une analisi statistiche, come che al è stât fat in altris regjons talianis. Pal moment si pue din fâ dome dai confronts provisoris cun altris glesiis antighis li dongje. Fra che stis si nomene cence altri la glesie di Sant Laurinç in Mont di Buie, fate sù scusat dal sigûr tal V-VI secul e che e ven a ciatâsi intune posizion un grum simil a chê di San Martin. Ancje in chest câs il sít al è dal sigûr stât frequentât in ete pre/prostoriche, come che i reperts archeologjics nus àn mostrât.


La glesie e seguìs il canon *ad solem orientem* seont lis racomandazions dal concei nicen, ma l'absit e ponte a plui o mancul 30 grâts a sud rispiet ae linie est-oest. Ancje se bisugnarà fâ un rilêf sul puest, chest al pararès pandi pluitost un alineament al solstizi d'unvier, fat dut câs interessant.

Dal dut different al è par esempli il câs dal domo di Sant Andree Apuestul a Vençon. Un rilevament preliminâr al à mostrât che l'absit e je direte viers il pont dulà che al nas il soreli ai ecuinozis sul orizont natural, che al è un grum alt par vie des monts che a son juste parsore il paîs a soreli jevât, seont i criteris carateristics de Ete di Mieç. Al contrari, par esempli, il domo di Udin al à un alineament che al è adiriture fûr di chê che e ven clamade *aplitudin ortive*, ven a stâi chel arc di orizont che al ten dentri i ponts di je-


vade e di lâ a mont dal soreli vie pal an. Par finî, la nestre glesie mari di Aquilee e je fûr di plui di 10 grâts rispiet ae direzion est-oest e duncje e podarès sei stade fondade sul cricâ di un dì di Pasche. Dut câs, la sô orientazion e semee seguî perfetementri il reticul de citât romane e, duncje, si pues pensâ che la basiliche e sedi stade fate sù parsore di un edifici roman preesistent, di prin che al rivâs il Cristianism a Aquilee. In efiets, si sa che i inzegnîrs romans, cuant che a tiravin il *cardo* e il *decumanus* no stevin tant a cjalâ aspiets simbolics e mistics; a jerin invezit un grum di plui atents ai fats pratics, come il cori vie des aghis ploanis e vie discorint.

Un altri sít che al merte atenzion al è par clâr chel di Zui: in efiets, i rescj de basiliche paleocristiane (che in dì di vuê no son visibii) a son inclinâts di un 5 grâts rispiet ae direzion est-oest. Dut





*Il centri di Vençòn viodût dal satelit. Il domo al è l'edifici in forme di crôs che si viôt tal mieg de fotografie*




câs, prime di tirâ une conclusion definitive, bisugnará fâ une schirie di rilevaments e studiâ la conformazion dal orizont naturâl. Al è interessant tignâ presint che la glesie di Sant Pieri in Cjargne, propit parsore di Zui, e je orientade cun buine aprossimazion su la direzion ecuinoziâl. Di fat, come che e à mostrât une analisi fate in colaborazion cul Grop Astronomic de Polse di Cougnes, la deviazion e je di dome 0.6 grâts.


Ce tancj altris sîts de Cjargne, come lis antighissimis glesiis vignudis ae lûs a Dieç e a Luincis di Ovâr, a spietin dome di sei studiâts e valorizâts ancje sot di chest aspiet.

Un ultin fat o ai voie di nomenâ culì, che nus puarte al pont dulà che o sin partîts, ven a stâi il cuel di Sant Martin di Dartigne. In efiets, la orientazion ecuinoziâl de gleseute nol è il sôl segn a caratar astronomic presint in chel sít. Pôc plui in bas, su la muraie che e circonde il



*La Lune, cuel di Sant Martin, Dartigne*





*Cussì a vevin di fâ i alineaments solârs i oms protostorics (dissen di Giovanni Patat d'Artegna)*

sagrât de glesie di Sante Marie Nassinte, si ciatin doi basrilêfs che a mostrin la lune e il soreli (o une stele). Lis dôs figuris a son stadis picadis su dôs pieris dal puest, par clâr modificadis par fâlis stâdrenti dal spessôr dal muraion. Lis dôs figuris a son un grum cunsumadis e ruvinadis (massime chê dal soreli/stele) e, pal moment, no àn une datazion sigure, ancje se al è vonde clâr che no son di ete romane. Ancje se simbui pagans di cheste sorte a son presints a voltis tes glesies cristianis par representâ il cori dal temp (come a Sant Laurinç in Mont di Buie o tal domo di Vençon), tal cás des dôs figuris di Dartigne al semee clâr che si ciatin denant a un contest dal dut different, viodus lis dimensions, la lavorazion e la forme dai manufats.

I doi basrilêfs a van tirâts fûr di li che a son cumò e esaminâts cun atenzion par cirî di dâur une datazion e une pussibil origin. Tal cás che si tratâs di material

preroman, come che la tradizion locâl e volarès, il suspiet di un sít archeoastronomic su la culine di Sant Martin al varès un fonde un pôc plui salde e lis ricercjis in cheste bande dal Friûl a cjaparessin une buine sburtade.

Naturalmentri, la archeoastronomie no pues dâ ciertecis ma dome indicazioni, che a scuegnin sei in ogni cás sostignudis dai reperts archeologjics. Mi fâs un grum plasê ricardâ culì che une campagne di sgjâfs par cure di Luca Villa si sta davuelzint su la culine e che planc a planc e sta puartant ae lûs ce che al reste dal grant cjestiel de Ete di Mieç. La sperance e je che une dì i sgjâfs a puedin slargjâsi fintremai insom de culine e che, come che mi à dit Gabriele Caiazza, autôr di un studi sul cuel di Dartigne, a puedin meti in lûs lis fondis de glesie di Sant Martin. E, in font, lis nestris stessis lidrîs.

---

*Chest al è il prin di trê contribûts sul stes argoment che a vignaran proponûts inte nestre riviste.*

